

**Porfin tin maneho di materia prima.....**

## **Demokrat ta boga pa tene preis pagabel pa pueblo**

Kralendijk- Den e diskushon di material pa konstrukshon ku resientemente a tuma lugá no a pone muchu atenshon riba greis ku tambe ta wòrdu usá den konstrukshon.

Sakamentu di greis no ta kumpli ku reglanan vigente kaminda ainda ta fresku den memoria di pueblo kon e proyekto di airopuerto a wòrdu paralisá temporalmente pa motibu ku a saka greis ilegal. Regularmente outoridatnan ta para e trùknan ku ta transportá greis, esaki ta trese frustrashon serka e doño di trùk pero tambe serka e kontratistanan.

Gobièrnu no tabata aktua ku man duru i a tolerá e asuntu pa no stanka e sektor di konstrukshon. Riba insistensia di partidonan di koalishon a duna FCB un buraku di greis den e área di 'Pasa Kontrami' pa asina por a kuminsá ku e proyekto di 101 kas pariba di e bario di Wanapa.

E pregunta ku mester wòrdu hasí ta kon ta posibel ku ta duna tereno, pèrmit di konstrukshon di 101 kas di pueblo sin ku pèrmit di saka piedra, santu i greis ta reglá. Un gobièrnu mester mira dilanti i traha ku maneho i vishon pa futuro i si esei no tuma lugá ta nifiká ku tin mal gobernashon.

Partido Demokrat ta kontentu ku su frakshon a presentá un moshon ku ta duna oportunitat na tur doño di ekipo pisá pa koba greis legalmente.

Partido Demokrat ta aploudí e echo ku gobièrnu ta trahando riba un maneho di materia prima (delfstoffenbeleid) ku mester indiká áreanan ku ta destiná pa saka material aki na Boneiru. E meta prinsipal pa haña material lokalmente ta pa mantené kupo di trabou, spar divisa i mantené gastunan di konstrukshon mas abou posibel.

Kas pagabel i proyektonan ku por kompetí riba merkado ta hopi importante sigur awor ku kosto di bida a subí barbaramente aki na Boneiru. Partido Demokrat ta deseá pa hür di kas di FCB keda mas abou posibel, konsiderando ku kosto di bida a subí, fasilitando FCB ku material di konstrukshon na bon preis mester por logra nos meta.

Awor ku krushernan a haña materia prima na un bon preis i ku importashon no ta nesario ta spera tambe ku ta tene preis di steenslag, santu i greis na un preis rasonabel. Fábrikanan di blòki a anunsiá ku lo oumentá preis di blòki siendo esaki no ta nesario komo ku e kosto pa produsí blòki no a subí.

Finalmente Demokrat ta urgí tur krusher i fábrika di blòki pa tene kuenta ku e konsumidó. Preisnan moderá lo stimulá mas konstrukshon ku na su turno lo krea mas kupo di trabou i esaki lo benefisiá nos ekonomia.